

FARSA

Ci su' cosi 'nta la vita complicati, 'mpirugghiusi⁽¹⁾,
pi' risolvili 'nfuddisci, li to' idee sunnu cunfusi,
raramenti tuttu va lisciu, tuttu si sburdi a meravigghia,
raramenti unu è letu, soddisfattu, doppu tantu parapigghia!

Di li drammi di stu' munnu ti nni fai,
ti senti amaru, pensi chi troppu sunnu i guai
e t'arrabbi cu' tia stessu, ti firli 'nta' lu' to' agnuni,
ogni cosa sconquassassi e mannassi a sdirrupuni.⁽²⁾

Ma chi diri, 'a vita è stramma, spissu capitanu cosi curiosi:
un politicu chiù seriu 'un veni elettu, picchè i mafiusi,
jucannu un pocu di cura, s'arruffianianu i votanti
e accusi acchiana unu cu' 'na testa chiù... **"vacanti"**.

Un picciottu chi addifenni a so' zita d'un vastasu,
veni pigghiatu e misu dintra, picchè, sapiti, 'u so' casu
è di omu **"assai"** violentu, picchè runa lignatuni
a un pizzazzu d'omu tristu, disonestu e lazzaruni.

1 - complicati

2- a rotoli

A un automobilista chi fa moriri un mischinu pi' "**distrazioni**"
 si ci runa 'na cunnanna nica, e prestu è misu 'n "**circolazioni**".
 Chi ran farsa chi è la vita, è 'na questioni di "**ironia**";
 c'è di chianciri, picciotti, chi pigghialla in allegria!

Pi' livari l'amarizza, riremu anticchia veramenti,
 cu' la storia di 'na signura chi, 'nto bagnu di l'aereu, accusi, distrattamenti,
 tirau 'u scaricu prima di sùsisi e, sapiti perciò 'na cosa?
 Passau l'oceanu appizzata, chi' 'a scaricata... funzionau di ventosa.



SANTU VALENTINU

Lu quattordici frivaru è la festa du' beatu Valentinu,
chi è lu santu pruttitturi di l'amuri, chiddu veru...genuinu.
Tutti i santi, i so' devoti, hannu beddi affezionati,
a lu santu Valentinu ci attuccaru 'i 'nnamurati.

A ogni santu lu chiffari 'un ci manca e prea sempri;
a lu santu Valentinu 'u tempu abbunna e ...'un fa nenti,
picchè, oggi, 'i 'nnamurati sunnu un pocu annacquateddi;
genti mia, ma unn'é st'amuri, tutti sunnu straviateddi.⁽¹⁾

Li promisi di li ziti, di li spusì affezionati,
sunnu spissu misi di latu e 'un vennu ricordati.
Perciò santu Valentinu, assai cunfusu e ammaraggiatu,⁽²⁾
prea a Diu chi 'nta stu' munnu, ognunu fussi natra vota 'nnamuratu.

1 - un po' fuori senno

2 - come presa da mal di mare



RITRUVARI 'I CULURA

Lu taliu senza villu, l'azzurru d'un cielu,
 lu viridi d'un pratu, d'un arvulu, d'un stelu.
 E ancora lu giallu d'un girasuli,
 lu russu sbampatu d'una rosa, di certi altri çiuri...



Ma l'occhi mei hannu ravanti comu un velu,
 pinzeri e tristizzi di grigiù li rincheru
 e 'un virinu autru, nuddu autru culuri,
 ogni cosa è appannata, senza chiù sfumaturi.

Ma, si abbagnu un pennellu 'nta la me' fantasia,
 pennellu ottimista chi cancella 'a malincunia,
 allora ogni cosa chi grigia e scura paria,
 ritorna a "**culuri**", attraversu 'a poisia.



UN PAISI TRA ... LI NUVULI

Tutti li dei si misiru r' accordu na' jurnata
e jeru a Ericsi pi' fari sulu 'na passata.

Essennu chi la negghia spissu la cummogghia comu un velu,
a iddri ci parsi chi, comu l'Olimpu, era suspisu 'ncelu.

Difatti ddà junti taliaru tuttu assai maravigghiati
e ci parsi chi all'Olimpu eranu turnati.

Chi postu beddru, chi cosa rara, cosa priziusa,
pinsaru tutti, ma Veniri chi di tutti è a chiù curiusa,

rissi: - Jò vi ricu chi mi piaci d'arristari -
accussi abitaù pi' un pocu 'nto casteddu, chi si po' ancora visitari.

A Ericsi tuttu parla di storia, arti, cultura:
chiesi, vecchi cummenti e puru 'i mura,



chi fatti, si rici, foru di' giganti
e chi attunnianu lu' paisi ci nn'è ancora tanti.

Da un pocu r'anni è centru di granni scenziati,
chi ccà si riuniscinu di tutti li latati.

Cu' veni apprezza 'a paci e l'aria ossigenata,
chi si respira 'nta la quieti di sta' muntagna 'mbalsamata.

Poi attirati d'un certu sfiziusu profuminu
ognarunu curri a mangiarisi un dolci ericinu.

Puru li Dei chi ddà certa jurnata ci acchianaru,
li dolci ericini tantu, e comu, assapuraru.

Poi si nni turnaru 'ncelu cu' rimpianu,
quasi c'avissiru vulutu arristari pi' sa' quantu.

O genti, si vuliti lu silenziu e la paci giusti apprezzari,
jti abitari a Erci, jò chi ci nascì, vi lu pozzu assicurari!



A LA SURGIVA

Cu' lu bummulu a lu ciancu, chi niscia du' fazzittuni
si nnia la picciuttedda
cu' supra a' testa lu mirriuni,
ja all'acqua frisca e bedda.

Capitava pi' la via
qualchi "**ncontru programmatu**"
a' picciotta si cunnucia..
e u' picciottu s'avia avvicinato.



Junti poi a la surgiva, cu' li manu a cuppineddu,
si vivianu l'acqua scurrenti
poi. ...scuccava un vasuneddu,
mentri u' bummulu si rinchia, si taliavanu cuntenti.

Arrubbatu era st'amuri, ma era duci, 'nzucaratu;
ora l'acqua arriva 'ncasa, mentri u' bummulu è all'agnuni.
U picciottu e la picciotta nenti hannu d'ammucciatiu;
unn'è chiù la poesia 'nta stu' munnu di 'mbrugghiuni?

LA PETRA

La petra unn' è sulu simbulu di 'nsensibilità,
po' aviri puru lu significatu di bonu principiu e di solidità.
- E chi s' cori di petra?! - Si dicia a 'na persuna tinta assai,
a n' omu senza sensu e senza onuri,
chi nni cummina di tutti li culuri.
Assauliddu ci nn'è di sti' campiuna,
nta' stu' munnu chi tortu è veramenti;
tanti hannu persu lu cori e anchi la menti,
picchè si raggiunassiru tanticchia,
la finissiru di pigghiarisi i tangenti,
calpestanu l'amuri da famigghia,
da genti onesta e di tutta a' società.
La petra è 'na cosa forti e dura,
difficili di putirisi 'ntaccari.
Fermi, forti e sicuri comu i petri,
li boni principi avissiru a turnari.



‘A MENNNULIDDA

‘A mennulidda, pi’ cu’ unn’ è ’nformatu
è un fruttu d’importanza universali
è un fruttu ‘nta cucina assai sfruttatu
ma , sulu qualchirunu ni fa cosi speciali.



O’ me’ paisi "ERICE" chiamatu,
riccu di storia e di biddizzi naturali,
‘a mennula è ingredienti ricercatu
pi’ fari i dolci antichi di "pasta reali".

Chi çiauru di viscotta e mustazzoli, cannola, cassateddi, genuvisi;
pi’ accattari e gustari i "cosa ruci" ditti du’ cummentu,
li genti vannu a frotti o’ me’ paisi
e vannu ni li picciotti pasticceri comu u’ ventu.

Na’ vota erano i monachi di San Carlu
chi facianu cu’ li mennuli tanti cosi,
ora lu dolci ericinu a farlu
sunnu l’alunni di li monachi ‘nnustriusi.

Picciuttedde muntisi dintra lu cummentu s’impararu
a fari dolci cu’ li giusti dosi,
prestu l’arti a li monachi scipparu
e poi ci misiru di so’ altri cosi.



Dunqui sapemu chi la mennula è regina
 di stu' regnu di granni attività,
 'mpastata cu' lu zuccaru, di sta' cosa fina
 si fannu vuccuna chi sunnu na' bontà.

Tutti li pasticceri di lu "**munti**"
 su bravi a fari bonu u' so' misteri
 ma s'havi a diri chi "**a tirata di cunti**"
 basta esperienza e sapiri stari 'mperi

puru la notti, si ci voli, pi' cunsigni
 chi vannu finu all'America e o' Giappone
 ma, comu in ogni cosa, tu m'insigni,
 ci voli fantasia e gran passioni;

picchè arti è arti, si si fa cu' convinzioni
 cu' arduri, cu' pacenzia e maestria
 cu' garbu, cu' ducizza, cu' attenzioni
 cu' interessi, tantu 'ngegnu e ...poesia!

